

ALAROBIA LAVENONA - TAONA - B



Ny Rainao izay mahita ny miafina no hamaly soa anao.

Ry Kristianina havana, amin'izao Alarobia fanosorana lavenona izao no idirantsika amin'ny vanim-potoanan'ny Karemy. Efa fantantsika mianakavy fa mandritra ny 40 andro ny karemy izay fotoana atolotry ny Eglizy hiomanantsika amin'ny fankalazana ny misterin'ny Paka izay midika hoe fandalovana (passage) ary ankalazantsika an'i Jesoa nandresy ny fahafatesana, maty izy kanefa nitsangan-ko velona.

Vakiteny I : Joely 2, 12-18

Tononkira : Salamo 50

Vakiteny II : 2 Kôr. 5, 20-6, 2

Evanjely : Mt. 6, 1-6, 16-18

Isika koa raha miara-maty amin'i Kristy amin'ny fahotana dia hiaraka hitsangana aminy ka miditra amin'ny fiainam-baovao. Miala amin'ny fiainana izay tsy mendrika ny maha zanan'Andriamanitra ka miditra amin'ny fiainana maha zanak'Andriamanitra. Izany indrindra ny antso avo nataon'ny mpaminany Joely

mpitondra ny hafatr'Andriamanitra. Araka ny averintsika matetika ny mpaminany dia tsy hoe izay mahalala ny hoavy fotsiny fa indrina ireo izay mahalala ny sitrak'Andriamanitra ka manambara azy amin'ny mpiara-belona ka hahatonga ireto farany hiombona amin'ny fiainana maha zanak'Andriamanitra izany. Nilaza i Joely mpaminany amin'ny vakiteny voalohany : *“Izao no lazain'ny Tompo: miverena amiko, amin'ny fonareo rehetra, amin'ny fifadian-kanina sy amin-dranomaso amam-pitarainana. Ny fonareo no rovidrovito, fa aza ny fitafianareo, dia miverena amin'ny Tompo Andriamanitrareo, fa mamindra fo sy miantra Izy, malain-kitezitra sy be hatsaram-po, ary ny loza afitsony dia alahelovany”*. Ny fonsika tokoa no rovitina satria avy ao no loharano sy fototra mahatonga ny fiainana sy fitondran-tena tsy mifanaraka amin'ny sitrak'Andriamanitra ireny. Io no ampitsiahivin'I Papa amintsika amin'ny hafatra ny karemy mamerina izay no lazain'I Jesoa ao amin'I Matio 24, 12 : *“Noho ny habetsahan'nyharatsiana dia hihamangatsika ny fanehoam-pitiavana”*.... Ka aoka hoy izy hitandriana isika fa maro

“Mpaminany sandoka” izay manohy ny nataon’i Bibilava tamin’ny Razantsika nahatonga azy ireo voafitaka ka lavo tamin’ny fakampanahy”

Tsy zavatra ety ivelany no manapotika ny fiainantsika na manimba ny fiainantsika fa ny fontsika. Raha tiantsika hihatsara ny fiainantsika aoka isika hiezaka hanatsara ny fontsika, hanenina amin’izay tsy mety rehetra ka hiezaka hiainana ny sitrak’Andriamanitra. Potehintsika ny ratsy rehetra ao ampontsika ka fo vaovao hitoeran’Andriamanitra sy hitoeran’i Jesoa. Izany indrindra no ezaka ataontsika amin’ny fanorenana ny Eglizy olona velona izao, isika mitoetra ao amin’i Jesoa sy itoerany ka hamokatra ny fiainantsika, ho feno hafaliana lavorary.

Matoa tsy mamokatra ny fiainantsika dia satria tsy itoeran’Andriamanitra ny fontsika satria efa feno zavatra maro ka tsy misy itoeran’i Jesoa intsony ary indrisy aza “encombré” amin’ny zavatra tsy mifanaraka amin’ny sitrak’Andriamanitra ny fontsika. Amin’izao fanombohan’ny karemy izao, aoka isika handinika tsara ny fiainantsika ka hanesotra ao am-pontsika ny “encombement” rehetra satria izany no ambaran’ny fanosorana ny lavelona. Efa potika toa ny lavenona ny fiainantsika noho ny fahotana na izany aza tsy izany no fiafarana raha manaiky miara-maty amin’ny fahotana miaraka amin’i Kristy isika dia manana anjara hiaraka hitsangana amin’i Kristy ka miditra fiainambaovao miaraka aminy koa : **“Mibebaha, ary minoa ny Evanjely”**.

Amin’ny vakiteny faharoa voalaza fa izao no fotoana tsara, izao no andro sarobidy, ary izao no andro hihavanantsika amin’Andriamanitra hoy Md Paoly. Izany no làlana hahazoantsika ny fahasoavana ao am-pontsika. Raha potehintsika ny fontsika sy miaiky ny fahotantsika isika dia efa manao dingana lehibe isika satria izany no làlana voalohany mitondra amin’ny fibebahana. Miaiky isika fa “encombré” ny fiainantsika manontolo ka manatona an’Andriamanitra sy manatona ny sakramentan’ny fampihavanana. Io no ambaran’i Md Paoly amintsika androany dia ny fahafantarantsika fa Andriamanitra dia be famindram-po ka mivonona manàtona azy isika satria izy hampihavana antsika aminy ary mahalala ny momba antsika manontolo izy : **“Mihavana re amin’Andriamanitra”** Amin’izao karemy izao miroso amin’ny fiainam-baovao isika sady manambara ny fa vonona hibebaka isika. I Jesoa ao amin’ny Evanjely milaza amintsika ny fototra anankitelo manambara ny fibebahana sy ny toe-piainana vaovao ary ny fitondran-tena mifanaraka amin’ny sitrapon’Andriamanitra izay manambara fibebahana ka miroso amin’ny fiombonana amin’i Jesoa :

- **Ny voalohany dia ny asa fiantrana** : manambara ny maha zanak’Andriamanitra ny asa fiantrana satria mifanasoa ka mikatsaka sy maneho amin’ny fiainantsika ny fikatsahana ny soa iombonana ary ampiharintsika eo amin’ny fiainantsika. Izany dia tsy atao antso avo na hipoerapoera na hiantsoana mpanao gazety na anaovana dokam-barotra fa atao ao am-po tokoa ka tanterahina amin’ny fiainana andavanandro satria takina amintsika ny fampitrahaofana ny azy amin’ny finoana.

Ny fiombonana amin'Andriamanitra no mahatonga antsika manatanteraka ny asa fiantrana satria hanahafana an'Andriamanitra izay mampiposaka ny masoandro amin'ny olona rehetra. Isika koa aoka hanatanteraka ny asa fiantrana izay tsy entina hireharehana fa hanambarana ny fiombonana amin'Andriamanitra satria ny tanjona dia ny hanahafana an'Andriamanitra araka ny voalazan'i Jesoa amin'ny evanjely androany *"Aoka izay ataon'ny tananao havanana tsy ho hitan'ny tananao havia fa Andriamanitra Ray mahita anao amin'ny mangingina no hahafantatra ny soa ataonao"*. Tsy tadiavana tombotsoa ny hanaovana ny asa fiantrana fa fitiavana maimaimpoana tahaka ny nataon'Andriamanitra amintsika.

Izany no làlana voalohany maneho fa efa miova ny fontsika, tsy misy "encombement" satria ny olona manao asa fiantrana dia tsy ao anatin'ny fitiavan-tena na ny fialonana na ny avonavona fa fitia tsy misy takalo, tsy misy tambiny.

- **Ny faharoa dia ny fivavahana**, izay hikatsahana ny fiombonana sy fifandraisana lalina amin'Andriamanitra. Tsy hoe hilaza isika fa tsy ilaina intsony ny mandeha an-deglizy raha miteny i Jesoa hoe : *"Ary raha mivavaka ianareo; aza mba manao tahaka ny mpihatsaravelatsihy, izay tia ny mivavaka mitsangana ao amin'ny Sinagôga sy eny anjoron-dalana, mba hahitan'ny olona azy. Lazaiko aminareo marina tokoa, fa efa azony ny valisoany. Fa lanao kosa raha hivavaka, dia midira ao ainin'ny efitranonao, ka rehefa voarindrinao ny varavarana, dia mivavaha amin'ny Rainao izay ao amin'ny mangingina, ary ny Rainao izay mahita ny ao amin'ny mangingina no hamaly anao."* Ny tian'i Jesoa ambara amintsika eto dia ny fo no efitrano ka mba tsy ho voakorontana ny encombement intsony fa iombonana amin'Andriamanitra izay midika koa ny fiombonana amin'ny olona rehetra ka mamporisika antsika handeha hivavaka hamonjy lameesa an-deglizy satria izany ny fivavahana farantampony dia ny fankalazana ny Eokaristia satria mandray an'i Kristy isika raha manao kominio ka miombona tanteraka aminy. Tsy misaraka amin'ny sakramenta hafa izany satria ny Eokoaristia no sakramentan'ny fampihavanana. Amin'izao làlana iombonantsika amin'Andriamanitra amin'ny alalan'ny karemy izao ka hahatonga ny fontsika ho efitrano sy tabernakl'Andriamanitra, aoka ary handray ny sakramentan'ny fampihavanana isika, hazoto hamonjy lameesa sy hanao kominio masina.

Manamafy izany i Md Paoly izany raha milaza " mihavana re amin'Andriamanitra". Rehefa mihavana amin'Andriamanitra isika amin'ny alalan'ny sakramentan'ny fampihavanana dia miombona amin'i Jesoa amin'ny eokaristia ka zary tabernakla ary isika no mitondra an'i Kristy eo amin'ny mpiara-belona mba hitoeran'i Jesoa eo anivontsika. Raha hitoerany isika dia hamokatra ny fiaraha-monintsika, hamokatra ny eglizy kely fianakaviansika, hamokatra ny eglizy fototra sy iraka misy antsika ary dia hidera sy hankalaza an'Andriamanitra isika satria fiainam-baovao izany ary antenaintsika amin'ny paka.

- **Ny fahatelo dia ny fifadian-kanina**, ialantsika ny fahotana voalazan'i Papa amin'ny hafatra dia ny vola ka zary Andriamanitra hivavahana.... Ny kibo lasa Andriamanitra amin'izao andro iainantsika izao ka manapotika ny fiainantsika sy tsy mahatonga antsika ho génération mpanorina ka zary lavitra ny Eglizy Olona Velona isika satria ny fitiavan-tenantsika no ampiharintsika ka ny rendrarendra ety ivelany sy ny fitiavan-tena no fivelomantsika sy zary filamatra. Mba handresena an'izany rehetra izany, mba tsy ho encombré ny fontsika dia hifady hanina isika, ilay hanina mampibaribary fa ny kibontsika no lasa Andriamanitra dia ny fitiavan-tena manangona ka tsy hahafantarantsika ny hafa sy hanilikilihantsika izy ireo. Aoka isika hamolaka ny tenantsika ka hiala amin'ny filandrantsin'ny nofo, ireo no "encombrement" manapotika ny fiainantsika ka mahatonga antsika mifamono. Raha tiantsika hiditra amin'ny fiainam-baovao sy ho paka ary hitoetra amintsika i Kristy ka hamokatra araky ny sitrak'Andriamanitra mba ho feno hafaliana isika dia aoka hifady ny filandratsy. Famantarana ny fifadian-kanina sy ny hena ny zoma araky ny mahazatra antsika. Sao dia misy mieritreritra hoe efa niova ny lalàn'ny Eglizy, tsy niova fa isika no mafy fo araky ny voalazan'i Jesoa ka aoka isika hiverina amin'ny tena izy ka afaka handresy ny "encombrement" manapotika ny fiainantsika. Tsy ny fifadiana ve fifadiana nefa fa ny fahafoizana ifampizarana amin'ny hafa

Ry Andriamanitra Rainay ô, milefitra ianao raha mietry tena izahay vahoakanao, mitony ianao raha manohitra ny otanay izahay. Arotsakao aminay ny fahasoavanao raha miezaka izahay mandresy ireny "encombrement" izay manapotika ny fiainanay. Enga anie hanokatra ny fonao aminay ianao, antongilano ny sofinao hihaino izao vavakay izao : enga anie izahay hahay hananararaotra izao fotoana izao, hanatanteraka ny fomba masina fanao amin'ny karemy hahatonga anay ho afa-pahotana ka ho tody soa amantsara amin'ny paka. Raha miara-maty aminao amin'ny fahotana izahay ry Jesoa dia hiaraka hitsangana aminao amin'ny paka ka hanana fiainam-baovao. Iza no fotoana sarobidy hialanay amin'izay mamatopatotra anay. Enga anie izahay ho vonona hiavana aminao sady hahay hanatanteraka ireo asa fiombonana aminao dia ny asa fiantrana. Enga anie izahay hamola-tena amin'ny alalan'ireny fifadian-kanina ka hahay hifampizara amin'ny hafa.

Enga anie izahay hanararaotra izao fotoana izao hihavana bebe kokoa aminao amin'ny alalan'ny sakramentan'ny fampihavanana sy Eokaristia amin'izay hitoetra ao aminao izahay sy hitoeranao ka hamokatra fiainam-baovao miaraka aminao. Amen